



A-N-T-I

ALIANSI NASIONÁL TIMOR LESTE BA TRIBUNÁL INTERNASIONÁL

Secretáriadu : Fongtil-Caicoli, Dili Timor Leste

Tel: +670 7266564 / 7289241

e-mail: lanarra.del@gmail.com or atino@laohamutuk.org

KOMUNIKADU IMPRENSA

Ita Ezije Justisa :

**“Tanba Ita Hadomi Dame, Hakarak Lia-Loos Hodi Hametin
Rekonsiliaun”**

Timór Leste Selebra tinan sanulu restorasaun ukun an, justisa no akuntabilidade ba krime kontra umanidade, krime funu no jenosídiu durante invazaun no okupasaun ilegál Indonézia nia seidauk hetan fatin.

Indonézia nia invazaun no okupasaun ilegál iha Timór-Leste hamutuk ema rihun 180,000 resin entre tinan 1975 no 1999. Assembleia Jerál Nasoins Unidas kondena brutalidade okupasaun militar dala ualu. Maibé, suporta forsa militar no política husi nasaun boot sira halo invazaun ne'e akontese. Hanesan hakerek ona iha relatóriu *Chega!*, ne'ebé ko'alia mós kona-ba krime graves kontra umanidade, krime funu no krime sira seluk ne'ebé kontra jurizdisaun universál.

Hafoin Indonézia sai husi Timór-Leste iha 1999, Nasoins Unidas estabelese Komisaun Inkéritu ida, no iha tempu ne'ebé hanesan Indonézia estabelese Komisaun ba investigasaun Violaasaun Direitus Umanus iha Timór-Leste (KPP-HAM) iha 2000, Komisaun ONU no KPP-HAM rekomenda katak nesesáriamente estabelese tribunál internasionál wainhira esforsu doméstika husi Indonézia, Nasoins Unidas, no Timór-Leste nian falla atu hakotu impunidade. Depois liu tiha dékada ida, impunidade nafatin iha no nia konsekuénsia hatudu momoos hela.

Unidade Krime Graves akuza ona ema na'in 391, inkluidu eis xefe militar Indonézia nian Jenerál Wiranto kona ba kazu 1999, maibé lori de'it ema na'in 87 ba julgamentu, iha 84 mak hetan akuzasaun. Liu 75% husi ema sira ne'e hetan ona akuzasaun, maioria ne'ebé la'ós sidadaun Timorenses, moris livre hela iha Indonézia, balun sai-ulun boot iha ne'ebá. ONU no Timór-Leste fó sai ona mandatu kapturasaun nian ba akuzadu na'in 303 ne'ebé barak mak seidauk kaer, iha kazu hirak ne'e mós prosesa de'it violasaun sira ne'ebé akontese iha 1999 no esklui tiha kazu violasaun sira entre 1975 no 1998.

Ohin kompleta tinan 10 Timór Leste festeja hodi komemora loron restorasaun ba ukun rasik an, felizmente daudaun ne'e povu moris iha situasaun livre, seguru no hakmatek kompara ho tinan sanulu resin rua liu ba kotuk ne'ebé povu moris iha terrór, tortura, omosídiu, no violasaun direitu umanu fundamentál ho forma seluk tan iha periodu okupasaun. Ami mós rekoñese katak iha ona esforsu balun ne'ebé estadu Timór Leste no Indonézia inklui nasoins unidas hala'o ona hodi buka solusaun ba krime pasadu sira no esforsu atu hakotu impunidade maibé esforsu hirak ne'e hotu hetan obstákulu barak iha dalan ba justisa.

Ho nune'e ANTI fó hanoin hikas ba parte hotu ne'ebé iha kompeténsia ba kazu krime grave ne'ebé komete husi autór kriminozu sira atu :

1. Nasoins unidas no comunidade internasionál ejerse nia obrigasaun hodi hahú mekanizmu efetivu ruma hodi prosesa kazu krime todan ne'ebé daudaun ne'e seidak iha solusaun kredível, tanba kazu krime todan iha Timór Leste periodu okupasaun, ne'e krime internasionál ne'ebé kontra lei umanitária internasionál no lei funu nia nune'e labele husik todan ne'e ba povu Timor Leste de'it mak tenke lori.
2. Husu ba nasoins unidas atu konsidera no diskute rekomendasaun komisaun peritu internasionál, KPP-Ham Indonézia no rekomendasaun CAVR nia ne'ebé hatete katak presiza estabelese tribunál internasionál ida ba kazu krime grave se mekanizmu doméstiku sira falla.
3. Husu ba governu Timór Leste atu labele taka dalan ba justisa no akuntabilidade ba kriminozu sira ne'ebé komete krime todan iha Timór Leste durante okupasaun Militar Indonézia nia nune'e bele asegura dame sustentável iha estadu direitu no demokrátiku, ami hatene katak nasaun foun ne'e seidak iha kapasidade nato'on atu enfrenta kazu ne'e mesak maibé kazu ne'e responsabilidade internasionál la'ós povu Timor Leste nia de'it.
4. Husu ulun boot sira Timor-Leste nian atu hahú asina no ratifika konvensaun internasionál kona-ba protesasaun ema hotu husi halakon forsadamente, bele hahú buka tuir Timor oan sira ne'ebé lakon forsada iha funu laran hodi lori hikas ba sira nia família.
5. Husu ba estadu Indonézia atu halo tuir ninia obrigasaun legál internasionál atu promove akuntabilidade ba krime todan sira ne'ebé akontese iha periodu okupasaun.
6. Husu ba sosiedade sivíl tomak atu labele dezanima ho obstákulu sira luta ba justisa maibé kontinua luta to'o loron ida justisa ne'ebé ita buka sei realiza.

"Luta ne'ebé la lakon mak luta ne'ebé la abandona."

(Patricia Isasa, ativista direitu umanu Arjentina).

Dili, 18 Maiu 2012

Ami ne'ebé mak saran lian;

Membro ANTI nian (Organizasaun Timór-Leste nian):

- Community Development Interest (CDI)
- East Timór Crisis Reflection Network (ETCRN)
- Forum Tau Matan (FTM)
- Front Mahasiswa Timór-Leste (FMTL)
- Asosiasaun HAK
- Judicial System Monitoring Program (JSMP)
- Kdalak Solimutu Institute (KSI)
- Knua Buka Hatene (KBH)
- Luta Hamutuk
- Mata Dalan Institute (MDI)
- Organizasaun Popular Vítima da Guerra (OPVG)
- Sekretariadu Timór-Leste NGO Forum (Fongtil)
- Institutu Timór-Leste ba Monitor no Analiza Dezenvolvimentu (La'o Hamutuk)